



**Sumáriu Kazu
Tribunál Distritál Oekusi
Abril 2021**

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la representa JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 27

Artigu	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika (VD) no tipu ilísitu sira kona-ba VD	18
Artigu 251 KP	Furtu simples	2
Artigu 207 KP	Kondusan sein karta	1
Artigu 157 KP	Ameasa	1
Artigu 145 KP	Ofensa ba integridade fízika simples	5
Totál		27

2. Totál desizaun ne'ebé JSMP monitoriza: 20

Tipu desizaun	Artigu	Númeru
Suspensaun ba prizaun nia ezekusaun	Artigu 68 KP	10
Pena multa	Artigu 67 KP	1
Admoestasaun	Artigu 82 KP	1
Omologa pedidu dezisténsia keixa	Artigu 262 KPP	8
Totál		20

3. Totál kazu sira ne'ebé adia tuir JSMP monitorizasaun : 0

4. Total kazu sira ne'ebé kontinua prosesu tuir JSMP nia monitorizasaun: 7

B. Deskripsaun sumáriu julgamentu ba desizaun kazu sira

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275

Telefone: 3323883 | 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

1. Krime ameasa

Nú. Prosesu : 0024/19.OEBCN
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Omologa pedidu dezisténsia keixa

Iha 08 Abril 2021, Tribunál Distritál Oekusi prezide julgamentu tentativa konsiliaun ba krime ameasa ne'ebé envolve arguidu Marcos Ote hasoru lezada Octaviana Sico Elo nu'udar arguidu nia viziña, iha Aldeia Oamna, Suku Usitaco Sub-distritu Nitibe, Distritu Oekusi.

Akuzasaun Prokuradór

Prokuradór akuza arguidu katak iha 15 Juñu 2019, iha oras tuku 23:00 kalan, arguidu tuda fatuk dala rua ba iha lezada nia uma no koa'lia mós ba lezada katak *"hau iha direitu atu hela iha rai ida ne'e, ó tenke sai husi rai ne'e tanba ó milisia nia oan, sekuandu ó la sai husi rai ne'e, hau sei sunu ó nia uma"*. Antes ne'e, arguidu ameasa ona atu sunu lezada nia uma.

Prokuradór akuza arguidu kontra artigu 157 KP kona-ba krime ameasa ho moldura penál to'o tinan 1 ka multa.

Produsaun ba prova sira

Bazeia ba artigu 262 (1) Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu ho lezada.

Iha prosesu konsiliaun ne'e, lezada hakarak dame malu no deziste tiha nia keixa hasoru arguida maibé husu ba arguidu atu labele repete ninia hahalok ne'e iha futuru. Alende ne'e, arguidu mós konkorda ho pedidu lezada nian no deklara katak arrepende ninia hahalok no promete sei la repete tan hahalok hanesan iha futuru.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezada. Nune'e bazeia ba artigu 262 (2) KPP, tribunál omologa akordu dame ne'e.

2. Krime ofensa ba integridade fízika simples

Nú. Prosesu : 0011/20.OEPMK
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos

Defeza : Dr. Calisto Tout
Desizaun : Omologa pedidu dezisténsia keixa

Iha 13 Abril 2021, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Domingos Cloe Obe hasoru lezadu Agostinho Bana, iha Aldeia Oemolo, Suku Lifau Sub-distritu Pante-makasar, Distritu Oekusi.

Akuzasaun Prokuradór

Prokuradór akuza arguidu katak iha 06 Novembru 2019, iha oras tuku 17:20 lokraik, arguidu hakbesik ba lezadu no tuku kedas dala ida ihaibun, tuku dala ida iha hasan parte karuk no buti dala ida iha kakorok. Aktu sira ne'e rezulta kanek ki'ik ihaibun, bubu no mean iha lezadu nia kakorok. Depois akontesimentu ne'e, lezadu hato'o keixa iha Ofisiál Polísia Suku (OPS)-Lifau no kontinua halo tratamentu saúde iha Ospitál Referral Oekusi. Anexa mós fotografia sira husi polísia kona-ba rezultadu violénsia sira ne'e. Antes ne'e, lezadu ho motorizada liuhusi estrada públiku no derrepente arguidu bolu no hapara tiha lezadu. Arguidu hakbesik'an ba lezadu no halo agresun sira ne'e hasoru lezadu.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu ho lezadu.

Iha prosesu konsiliaun ne'e, lezadu hakarak dame no deziste tiha nia keixa hasoru arguidu maibé ho kondisaun katak arguidu tenke fó indemnizasaun sivíl ba lezadu ho valór osan US\$50.00. Arguidu konkorda ho lezadu nia pedidu ne'e no deklara katak arrepende ninia hahalok no promete sei la repete tan hahalok hanesan ne'e iha futuru.

Alegasaun finál

Prokuradór no defeza apresia akordu dame ne'ebé parte rua deside no husu ba tribunál atu omologa prosesu ne'e.

Desizaun

Bazeia ba akordu dame husi parte rua inklui indemnizasaun ba lezadu ho valór osan US\$50.00, nune'e tribunál konklui prosesu ne'e no omologa akordu dame ne'e.

3. Krime ofensa ba integridade fízika simples ho natureza violénsia doméstika

Nú. Prosesu : 0178/20.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Pedro Baptista Aleixo dos Santos
Defeza : Dr. Calisto Tout

Desizaun

: Pena prizaun fulan 9 suspende ba tinan 1

Iha 13 Abril 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JPR hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 22 Dezembru 2020, iha oras tuku 14:45 lokraik, arguidu tuku lezada dala ida iha reen-toos rezulta kanek ki'ik, bubu no moras. Antes ne'e, lezada husu osan ba arguidu atu kompras sasan uma laran nian tanba lezada ho nia kolega sira atu arisan iha sira nia uma maibé arguidu lakohi fó osan ba lezada nune'e sira diskute malu to'o mosu agresaun ne'e. Kazu ne'e aneksa hamutuk ho relatóriu médiku husi Ospital Referral Oekusi no fotografia husi polísia kona-ba rezultadu husi violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no deklara mós katak arrepende ninia hahalok. Arguidu hatutan katak depoisde akontesimentu ne'e arguidu husu deskulpa ba lezada no dame malu ona ho lezada to'o agora. Liután arguidu deklara katak foin primeiravés halo krime no iha oan na'in tolu, nia serbisu hanesan profesór iha Escola Báziku ho rendimentu kada fulan US\$323.00 no promete sei la repete ninia hahalok hanesan hasoru lezada ka ema seluk iha futuro.

Alende ne'e, lezada mós kontinua konfirma faktu sira iha akuzasaun no deklara katak arguidu husu deskulpa ona nune'e sira dame malu no kontinua moris hamutuk to'o agora.

Alegasaun finál

Prokuradór konsidera faktu sira ne'ebé hakerek iha akuzasaun ne'e loos hotu tanba iha produsaun ba prova arguidu rasik konfesa integralmente. Alende ne'e, número krime sira ne'ebé akontese iha uma laran kontinua aumenta iha Regiaun Oekusi kompara ho munisípiu sira seluk tanba kada loran sempre iha kazu ne'ebé ho natureza hanesan. Ho nune'e, prokuradór laiha dúvida no konsidera arguidu ninia hahalok ne'e preense duni elementu krime husi ofensa ba integridade fízika simples ho natureza violénsia doméstika, nune'e husu ba tribunál atu aplika pena prizaun fulan neen suspende ba tinan ida.

Entretantu defeza husu ba tribunál atu aplika pena ne'ebé adekuadu ho konsiderasaun sira katak arguidu iha kolaborasaun di'ak ho tribunál, konfesa faktu hotu iha akuzasaun, arrepende ninia hahalok, dame malu ona ho lezada, serbisu hanesan profesór ho rendimentu kada fulan US\$323.00, iha oan na'in tolu, primeiravés mai hatan iha tribunál no arguidu mak responsabiliza ba nia família.

Desizaun

Depoisde avalia faktu sira hotu, tribunál prova arguidu tuku dala ida iha lezada nia ren-toos. Arguidu nia aktu ne'e konfirma mós ho relatóriu médiku husi Ospital Referral Oekusi no fotografia husi polisia kona-ba rezultadu husi violénsia sira ne'e.

Bazeia ba faktu provadu sira no prova dokumental sira hanesan relatóriu médiku no fotografia inklui tetu sirkunstánsia sira ne'ebé haleu iha krime, nune'e tribunál konklui prosesu ne'e no kondena arguidu ho pena prizaun fulan sia suspende ba tinan ida.

4. Krime ofensa ba integridade física simples ho natureza violénsia doméstika

Nú. Prosesu : 0050/20.OEPMK
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Pedro Baptista Aleixo dos Santos
Defeza : Dr. Daniel Elo (advogado privado)
Desizaun : Pena prizaun fulan 6 suspende ba tinan 1

Iha 14 Abril 2021, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JC hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 30 Novembru 2020, iha oras tuku 07:00 dadeer, arguidu basa lezada dala rua iha hasan parte loos resulta moras. Arguidu kontinua tebe dala ida iha lezada nia knosen parte loos resulta moras to'o susar atu dada iss. Kazu ne'e aneksa hamutuk ho relatóriu médiku husi PRADET no fotografia husi polisia kona-ba rezultadu violénsia sira ne'e. Antes agresaun ne'e, arguidu la hatan atu lezada kal-kalan ba iha mate uma (lezada nia inan mate) hodi hader kalan hitu iha lezada nia inan/aman sira nia uma, nune'e sira diskute malu no arguidu halo agresaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu sira iha akuzasaun no rekoñese katak agresaun sira hanesan basa no tebe lezada ne'e hahalok ladi'ak no resulta moras. Alende ne'e, arguidu mós deklarara katak depoisde akontesimentu ne'e arguidu husu fali deskulpa ba lezada, dame malu no kontinua moris hamutuk to'o agora. Arguidu mós arrepende ninia hahalok, promete sei la repete ninia hahalok ne'e hasoru lezada ka ema seluk iha futuro, foin primeiravés mai hatan iha tribunál, serbisu hanesan motorista iha instituisaun independente ida ho rendimentu kada fulan US\$222.00 no arguidu ho lezada iha ona oan na'in haat.

Alende ne'e, lezada mós kontinua konfirma faktu sira iha akuzasaun no deklarata katak depoisde akontesimentu ne'e arguidu husu deskulpa ba lezada no kontinua moris hamutuk hanesan feen-laen ate agora. Lezada mós deklarata katak foin primeiravés hetan agresaun husi arguidu.

Alegasaun finál

Prokuradór konsidera arguidu ninia hahalok sira provadu tuir akuzasaun. Tanba ne'e, husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza husu ba tribunál atu aplika pena ne'ebé adekuaudu tanba konsidera arguidu kolabora di'ak ho tribunál, arrepende ninia hahalok, serbisu hanesan motorista, di'ak malu ona ho lezada, iha oan na'in haat, arguidu mak responsabiliza ba nia família no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu basa dala rua iha lezada nia hasan parte loos no tebe dala ida iha lezada nia knosen parte loos. Bazeia ba faktu provadu sira ne'e no prova dokumental sira inklui mós tetu sirkunstansia sira ne'ebé haleu iha krime ne'e, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

5. Krime ofensa ba integridade física simples

Nú. Prosesu	: 0095/20.OESIC
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Dr. Marcelino Marques Coro
Desizaun	: Omologa pedidu dezisténsia keixa

Iha 15 Abril 2021, Tribunál Distritál Oekusi prezide julgamentu tentativa konsiliaun ba krime ofensa ba integridade física simples ne'ebé envolve arguidu Cristiano da Costa, Silvester da Costa, Januario da Costa no Julio da Costa hasoru lezadu Felismino da Costa, iha Aldeia Usapibela, Suku Lalisuc Sub-distritu Pante-makasar, Distritu Oekusi.

Akuzasaun Prokuradór

Prokuradór akuza arguidu sira katak iha 05 Juñu 2020, iha oras tuku 11:30 meiodia, lezadu ta'a hela tali tahan iha nia kintal atu faan tali tahan ne'e maibé arguidu Silvester hasé lezadu katak tun husi tali tahan ne'e. Liu tiha oras balun arguidu sira seluk mós to'o iha fatin ne'e no sira hamutuk halo agresaun física hasoru lezadu. Arguidu Cristiano buti lezadu nia kakorok no tuku dala tolu iha lezadu nia kanuruk. Arguidu Januario hako'ak metin lezadu no riba tun ba rai. Arguidu Silvester lori liman rua mós buti lezadu nia kakorok dala ida. Enkuantu arguidu Julio, maski la baku lezadu maibé fó apoiu ba arguidu sira seluk hodi halo agresaun hasoru lezadu tanba arguidu Silvester nu'udar sira nia maun. Kazu ne'e aneksa hamutuk ho prova dokumentu sira hanesan relatóriu medíku husi Ospital Referral Oekusi no fotografia sira husi polísia.

Prokuradór akuza arguidu sira kontra artigu 145 KP kona-ba krime ofensa ba integridade fízika simples ho moldura penál too tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu sira ho lezadu.

Iha prosesu konsiliaun ne'e, lezadu hakarak dame malu ho arguidu sira maibé ho kondisaun katak kada arguidu tenke fó indemnizasaun sivíl ba lezadu ho valór osan US\$50.00, total US\$200.00. Arguidu sira mós konkorda ho pedidu husi lezadu nian ne'e no deklarata katak arrepende sira ninia hahalok no promete sei la repete hahalok hanesan iha futuru. Ho nune'e lezadu husu ba tribunál atu deziste tiha ninia keixa hasoru arguidu sira.

Alegasaun finál

Prokuradór no defeza apresia akordu dame ne'ebé parte rua deside no husu ba tribunál atu omologa prosesu ne'e.

Desizaun

Bazeia ba akordu dame husi parte rua ne'ebé inklui ho kondisaun katak kada arguidu tenke fó indemnizasaun ba lezadu ho valór osan US\$50.00 ho total US\$200.00, nune'e tribunál deside arguidu sira atu entrega osan ne'e ba lezadu iha 15 Maiu 2021 no omologa akordu dame ne'e.

6. Krime ofensa ba integridade fízika simples

Nú. Prosesu	: 0077/20.OESIC
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Dr. Marcelino Marques Coro
Desizaun	: Omologa pedidu dezisténsia keixa

Iha 20 Abril 2021, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Luciano Caba hasoru lezada Anastacia Caba nu'udar arguidu nia alin fetu, iha Aldeia Sakato, Suku Nipani Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 13 Maiu 2020, iha oras tuku 11:00 meiodia, arguidu basa dala ida iha lezada nia matan parte karuk, tebe dala ida iha lezada nia kelen parte karuk no kontinua ka'er lezada nia fu'uk rasta ba rai. Aktu sira ne'e rezulta lezada sofre moras. Antes ne'e, arguidu la hatan atu lezada lori nia inan nia kartaun eleitoral ba iha Xefe Suku atu rejistu hodi bele hetan subsidiu relasiona ho Covid-19, nune'e sira diskute malu no arguidu halo agresaun refere hasoru lezada. Kazu ne'e aneksa

hamutuk ho prova dokumental sira hanesan relatóriu medíku husi Ospital Referral Oekusi no fotografia sira husi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu ho lezada.

Iha prosesu konsiliaun ne'e, lezada hakarak dame malu ho arguidu nu'udar nia maun no husu atu arguidu la repete ninia hahalok hanesan iha futuru. Alende ne'e, arguidu mós konkorda ho pedidu husi lezada nian no deklara katak arrepende ninia hahalok no promete sei la repete tan hahalok hanesan iha futuru. Ho nune'e, lezada husu ba tribunál atu deziste tiha ninia keixa hasoru arguidu.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezada, nune'e tribunál konklui prosesu ne'e no omologa akordu ne'e no subliña atu arguidu la bele repete ninia hahalok hanesan iha futuru.

7. Krime ofensa ba integridade física simples

Nú. Prosesu	: 0043/20.OESIC
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Mateus Nesi
Defeza	: Dr. Filipe Landos
Desizaun	: Omologa pedidu dezisténsia keixa

Iha 20 Abril 2021, Tribunál Distritál Oekusi prezide julgamentu tentativa konsiliaun ba krime ofensa ba integridade física simples ne'ebé envolve arguidu Venancio Maia (Membro BOP) ho Luis Infein (Membro BOP) hasoru lezadu Henricos dos Santos, iha Aldeia Sanane, Suku Costa Sub-distritu Pante-makasar, Distritu Oekusi.

Akuzasaun Prokuradór

Prokuradór akuza katak iha 10 Marsu 2020, iha oras tuku 23:00 kalan, arguidu Venancio tuku dala rua iha lezadu nia hirus-matan rezulta moras. Enkuantu arguidu Luis uza *stic* fai dala ida iha lezadu nia kabun rezulta moras. Kazu ne'e aneksa hamutuk ho prova dokumental sira hanesan relatóriu médíku husi Ospital Referral Oekusi no fotografia sira husi polísia. Antes agresaun sira ne'e, lezadu foin fila husi nia bin nia uma, bainhira to'o iha lezadu nia uma, lezadu haree odamatan oin nakloke

nune'e lezadu tolok kedas maibé la temi ema ruma nia naran no arguidu sira ne'ebé tur hela iha lezadu nia uma halo kedas agresaun hasoru lezadu.

Prokuradór akuza arguidu sira kontra artigu 145 KP kona-ba ofensa ba integridade física simples ho moldura penál to'o tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaaun, nune'e antes tama ba julgamentu produsaun ba prova, juis husu atu halo tentativa konsiliaaun ba arguidu sira ho lezadu.

Iha prosesu konsiliaaun ne'e, lezadu hakarak dame malu ho arguidu sira tanba sira nu'udar kolega di'ak maibé husu ba arguidu sira atu la repete tan sira ninia hahalok hanesan iha futuru. Alende ne'e, arguidu sira mós konkorda ho lezadu nia pedidu no deklarata katak arrepende sira ninia hahalok ne'e no promete sei la repete tan iha futuru. Ho nune'e lezadu husu ba tribunál atu deziste tiha ninia-keixa hasoru arguidu sira.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu, nune'e tribunál konklui prosesu ne'e no omologa akordu dame ne'e no husu ba arguidu sira atu hatudu hahalok ne'ebé di'ak iha futuru.

8. Krime furtu simples

Nú. Prosesu	: 0022/20.OEOSL
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Pedro Baptista Aleixo dos Santos
Defeza	: Dr. Marcelino Marques Coro
Desizaun	: Omologa pedidu dezisténsia keixa

Iha 20 Abril 2021, Tribunál Distritál Oekusi prezide julgamentu tentativa konsiliaaun ba krime furtu simples ne'ebé envolve arguidu Nelson Abi hasoru lezadu Francisco Neno, iha Aldeia Hoineno, Suku Bobometo Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 18 Novembru 2020, iha oras tuku 16:00 lokraik, arguidu tuda mate lezadu ninia bibi ida no tau tiha bibi ne'e iha saku laran no iha momentu hanesan lezadu mós to'o iha fatin akontesimentu. Tanba ne'e, lezadu hasé arguidu no ba keixa kedas iha xefe aldeia no Ofisiál Polisia Suku (OPS). Kazu ne'e aneksa hamutuk ho prova dokumental hanesan fotografia husi polisia.

Prokuradór akuza arguidu kontra artigu 251 KP kona-ba furtu simples ho moldura penál to'o tinan 3 ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun, juis husu atu halo tentativa konsiliaun ba arguidu ho lezadu.

Iha prosesu konsiliaun ne'e, lezadu hakarak deziste tiha keixa hasoru arguidu tanba antes julgamentu arguidu rekoñese ona ninia hahalok no fó multa ona ba lezadu. Arguidu mós konkorda ho lezadu nia pedidu ne'e no promete sei la repete tan hahalok hanesan iha futuro.

Alegasaun finál

Prokuradór no defeza apresia akordu dame ne'ebé parte rua decide no husu tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu, nune'e tribunál konklui prosesu ne'e no omologa akordu dame ne'e, maibé tribunál nafatin husu ba arguidu atu labele repete hikas ninia hahalok hanesan iha futuro no tenke hatudu hahalok ne'ebé di'ak.

9. Krime ofensa ba integridade fízika simples ho natureza violénsia doméstika

Nú. Prosesu : 0049/19.OEBCN
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena admoestasaun

Iha 21 Abril 2021, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 13 Novembru 2019, iha oras tuku 19:00 kalan, arguidu lori tali-masa ida no baku dala ida iha lezada nia tilun-hun parte loos rezulta kanek ki'ik no bubu. Antes ne'e, lezada si'ak sira nia oan ne'ebé ba Dili no husik hela nia inan faluk mesak iha uma. Tanba ne'e, arguidu dehan ba lezada atu labele si'ak sira nia oan tanba labarik sira sei filafali maibé lezada nafatin hirus no ko'alia lapara nune'e mak arguidu halo agresaun refere hasoru lezada. Kazu ne'e aneksa mós ho relatóriu médiku husi sentru saúde no fotografia husi polísia kona-ba rezultadu husi violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak nia hatene hahalok ne'e ladi'ak no bele lori konsekuensia ba lezada nia isin-lolon. Arguidu mós arrepende ninia hahalok no husu ona deskulpa ba lezada, nune'e sira dame malu ona no kontinua moris hamutuk. Arguidu promete sei la repete ninia hahalok ne'e iha futuru hasoru lezada ka ema seluk, foin primeiravés mai hatan iha tribunál, serbisu hanesan to'os na'in no laiha rendimentu fixu kada fulan. Arguidu hatutan tan katak sira moris hamutuk desde tinan 2018 no seida'uk iha oan.

Nune'e mós lezada kontinua konfirma faktu sira hotu iha akuzasaun no deklara katak sira dame malu ona no arguidu foin primeiravés halo krime hasoru lezada.

Alegasaun finál

Prokuradór konsidera faktu hotu provadu bazeia ba arguidu nia konfisaun no lezada nia konfirmasaun. Tanba ne'e, konsidera arguidu ninia hahalok ne'e prenze duni elementu husi krime ofensa ba integridade fízika simples ho natureza violénsia doméstika. Tanba ne'e, husu ba tribunál atu aplika pena prizaun fulan neen suspende ba tinan ida.

Entretantu defeza husu ba tribunál atu aplika pena admoestasaun ba arguidu ho konsiderasaun sira ba iha arguidu nia kolaboraauun di'ak ho tribunál, dame malu ona ho lezada, arrependimentu, nu'udar agrikultór arguidu laiha rendimentu fixu kada fulan, primeiravés mai hatan iha tribunál no arguidu mak responsabiliza ba ninia família.

Desizaun

Depoide avalia faktu sira hotu, tribunál prova katak arguidu lori tali-masa ida no baku dala ida iha lezada nia tilun-hun parte loos. Bazeia ba prova sira no prova dokumental inklui tetu mós sirkunstansia atenuante sira hanesan arguidu konfesa faktu sira, arrepende ninia hahalok, foin primeiravés mai hatan iha tribunál, arguidu nia idade avansadu ona no promete sei la repete tan ninia hahalok hanesan iha futuru, nune'e tribunál konklui prosesu ne'e no kondena arguidu ho pena admoestasaun.

10. Krime ofensa ba integridade fízika simples ho natureza violénsia doméstika

Nú. Prosesu : 0010/20.PDOEC
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun tinan 2 suspende ba tinan 2

Iha 21 Abril 2021, Tribunál Distritál Oekusi prezide julgamentu leitura sentensa ba kazu krime ofensa ba integridade fízika simples ho natureza violénsia doméstika ne'ebé envolve husi arguidu DF hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 03 Dezembru 2019, iha oras tuku 00:00 kalan fahe-rua, arguidu basa dala ida iha lezada nia hasan parte loos no tebe dala ida iha lezada nia kanotak parte karuk. Aktu sira ne'e rezulta hasan parte loos no kanotak parte karuk moras. Antes ne'e, arguidu fila ba sira nia uma ho kondisaun lanu no halo kedas agresaun hasoru lezada. Kazu ne'e aneksa hamutuk ho relatóriu médiku husi Ospital Referral Oekusi no fotografia husi polisia kona-ba rezultadu husi violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arrepende ninia hahalok. Arguidu mós hatutan nia hatene hahalok hanesan ne'e ladi'ak no bele lori konsekuensi ladi'ak mós ba lezada. Liutan arguidu deklara katak arguidu husu ona deskulpa ba lezada nune'e sira dame malu ona no kontinua moris hamutuk to'o agora. Arguidu promete sei la repete ninia hahalok hanesan iha futuru hasoru lezada ka ema seluk, foin primeiravés mai hatan iha tribunál, serbisu hanesan agrikultór nune'e laiha rendimentu fixu kada fulan no iha oan na'in haat.

Alende ne'e, lezada kontinua konfirma faktu sira iha akuzasaun no deklara katak arguidu husu ona deskulpa ba lezada, dame malu ona no kontinua moris hamutuk. Lezada mós hatutan katak arguidu foin primeiravés halo krime hasoru lezada no to'o agora arguidu la halo tan ona krime hasoru lezada.

Alegasaun finál

Prokuradór konsidera arguidu ninia hahalok sira provadu tuir faktu sira ne'ebé hakerek ona iha akuzasaun. Alende ne'e, arguidu nu'udar xefe família tuir loloos arguidu mak tenke kitudadu no fó protesaun ba iha nia família, maibé pelu kontráriu arguidu mak halo fali violénsia hasoru ninia família. Tanba ne'e, husu ba tribunál atu kondena arguidu tuir pena ne'ebé previstu iha artigu 145 KP.

Entretantu defeza husu ba tribunál atu aplika pena ne'ebé adekuaudu ho konsiderasaun sira ba iha arguidu nia kolaborasaun, arrependimentu, rendimentu ne'ebé la fixu kada fulan, oan na'in haat, di'ak malu ona ho lezada, iha responsabilidade ba família no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia hasan parte loos no tebe dala ida iha lezada nia kanotak parte karuk. Tanba ne'e, tribunál konsidera arguidu ninia hahalok ne'e prenze duni dolu direita.

Bazeia ba prova sira no prova dokumental inklui tetu mós sirkunstasia atenuante sira hanesan arguidu konfesa faktu sira, arrepende ninia hahalok, foin primeiravés mai hatan iha tribunál, promete sei la repete ninia hahalok hanesan iha futuru, nune'e

tribunál konklui prosesu ne'e no kondena arguidu ho pena prizaun tinan rua suspende ba tinan rua.

11. Krime ofensa ba integridade física simples ho natureza violência doméstica

Nú. Prosesu : 0197/20.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Pedro Baptista Aleixo dos Santos
Defeza : Dr. Marcelino Marques Coro
Desizaun : Pena prizaun tinan 1 fulan 8 suspende ba tinan 2

Iha 21 Abril 2021, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu JA hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 26 Dezembru 2020, iha oras tuku 10:00 dadeer, arguidu basa dala ida lezada iha lezada nia oin, lori ai-sanak ida baku iha lezada nia liman-kabun parte loos no sama lezada nia ain-fuan boot parte loos. Aktu sira ne'e rezulta lezada sofre metan iha oin, bubu iha ain-kabun no ain-fuan boot naksalak. Antes ne'e, arguidu ho lezada diskute malu kona-ba família sira husi parte lezada nian ne'ebé la partisipa iha serimonia kultural ne'ebé realiza husi parte arguidu, nune'e arguidu la kontente no halo agresaun refere hasoru lezada. Kazu ne'e aneksa hamutuk ho prova dokumental sira hanesan relatóriu médiku husi PRADET no fotografia husi polícia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu sira iha akuzasaun no deklarata katak arrepende ninia hahalok. Arguidu hatutan katak nia hatene agresaun ne'e bele lori konsekuénsia ladi'ak maibé depoisde akontesimentu ne'e dame malu kedas ho lezada no kontinua moris hamutuk to'o agora. Arguidu mós promete sei la repete ninia hahalok ne'e iha futuru tantu hasoru lezada ka ema seluk. Arguidu deklarata tan katak foin primeiravés mai hatan iha tribunál, serbisu hanesan funsionáriu (*cleaner*) iha Sekretariu Regionál ministériu ida ho rendimentu kada fulan US\$162.00 no iha oan na'in lima.

Nune'e mós lezada kontinua konfirma faktu sira hotu iha akuzasaun no konfirma mós ho arguidu nia deklarasaun katak sira dame malu ona, kontinua moris hamutuk to'o agora no arguidu foin primeiravés halo krime hasoru lezada.

Alegasaun finál

Prokuradór konsidera faktu sira provadu bazeia ba arguidu nia konfisaun no lezada nia konfirmasaun ba iha faktu sira. Tanba ne'e, prokuradór fixa pena ba arguidu mak pena multa loraun 90 no taxa judisiál kada loraun US\$0.50.

Entretantu defeza konsidera arguidu kolabora di'ak ho tribunál, arrepende ninia hahalok, serbisu hanesan funsionáriu ho rendimentu kada fulan US\$162.00, di'ak malu ona ho lezada, foin primeiravés mai hatan iha tribunál, oan na'in lima no iha responsabilidade ba família, nune'e husu ba tribunál atu aplika pena ne'ebé adekua ba arguidu.

Desizaun

Depoiz de avalia faktu sira hotu, tribunál prova katak arguidu basa dala ida iha lezada nia oin, ho ai-sanak baku iha lezada nia liman kabun parte loos no katak sama lezada nia ain-fuan bo'ot parte loos. Bazeia ba faktu provadu hirak ne'e, prova dokumental no tetu mós sirkunstánsia atenuante sira hanesan arguidu kolabora di'ak ho tribunál, konfesa faktu sira, arrepende ninia hahalok, oan na'in lima no promete la repete nia hahalok hanesan iha futuru, nune'e tribunál konklui prosesu ne'e no kondena arguidu ho pena prizaun tinan ida fulan ualu suspende ba tinan rua.

12. Krime ofensa ba integridade física simples ho natureza violénsia doméstika

Nú. Prosesu : 0007/20.OEOSL
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 2 maibé suspende ba tinan 2

Iha 22 Abril 2021, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu AT hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 04 Juñu 2020, iha oras tuku 08:00 dadeer, arguidu basa dala ida iha lezada nia hasan parte loos, buti dala ida iha lezada nia kakorok no tuku dala ida iha lezada nia matan-fukun parte karuk. Aktu sira ne'e rezulta lezada sofre moras iha hasan parte loos no kokorok no bubu iha lezada nia matan-fukun. Antes ne'e, lezada ko'us hela sira nia oan bebe ne'ebé tanis nune'e lezada haruka arguidu atu halo susubeen maibé arguidu hirus no halo agresaun refere hasoru lezada. Kazu ne'e aneksa hamutuk ho prova dokumental sira hanesan relatóriu médiku husi sentru saúde no fotografia sira husi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no hatene katak halo violénsia hasoru lezada bele lori konsekuénsia ladi'ak ba lezada maibé arguidu arrepende ninia hahalok ne'e, dame malu ona ho lezada no kontinua moris hamutuk

hanesan feen-laen. Arguidu mós promete sei la repete ninia hahalok hanesan hasoru lezada ka ema seluk iha futuru, foin primeiravés mai hatan iha tribunál, serbisu hanesan kondutór trek ho rendimentu kada fulan US\$185.00 no iha ona oan na'in ida.

Alende ne'e, lezada mós kontinua konfirma faktu sira hotu iha akuzasaun no konfirma mós ho arguidu nia deklarasaun katak sira dame malu ona, kontinua moris hamutuk no to'o agora arguidu la repete ninia hahalok ne'e. Lezada hatutan katak arguidu foin primeiraves halo krime hasoru lezada.

Alegasaun final

Prokuradór konsidera faktu sira iha akuzasaun provadu tanba arguidu rasik konfesa integralmente ba faktu sira ne'e. Alende ne'e, arguidu mós iha responsabilidade ba sira nia oan nune'e arguidu bele halo susubeen la'os buat hotu lezada mak tenke halo. Tanba ne'e, husu ba tribunál atu aplika pena prizaun tinan ida fulan neen suspende ba tinan rua.

Entretantu defeza husu ba tribunál atu aplika pena ne'ebé adekuadu ba arguidu tanba arguidu kolabora di'ak ho tribunál, arrepende ninia hahalok, di'ak malu ona ho lezada, serbisu hanesan motorista truk ho rendimentu kada fulan US\$185.00, iha oan na'in ida, foin primeiravés mai hatan iha tribunál no arguidu mak responsabiliza ba nia família.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia hasan parte loos, buti dala ida iha lezada nia kakorok no tuku dala ida iha lezada nia matan-fukun parte karuk. Bazeia ba faktu provadu sira no prova dokumentu sira inklui tetu mós sirkunstánsia atenuante sira hanesan arguidu arrepende ona ninia hahalok, dame malu ona ho lezada, arguidu promete sei la repete ninia hahalok hanesan iha futuru, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

13. Krime ofensa ba integridade física simples ho natureza violéncia doméstika

Nú. Prosesu : 0007/20.OEPSB
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 1 maibé suspende tiha ba tinan 1

Iha 22 Abril 2021, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu DPQ hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 09 Jullu 2020, iha oras tuku 08:00 dadeer, lezada tein hela no lezada haruka arguidu atu fó haris sira nia oan feto ho idade tinan lima. Ho nune'e arguidu tebe dala ida iha lezada nia kelen parte karuk no uza kalsa hena ida baku dala

lima iha lezada nia isin-lolon parte kotuk. Arguidu kontinua dada no rakut lezada nia fu'uk. Aktu sira ne'e rezulta lezada sofre moras iha kelen no ulun. Kazu ne'e aneksa hamutuk ho relatóriu médiku husi sentru saude no fotografia sira husi polísia kona-ba rezultadu husi violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu parsialmente katak tebe no uza kalsa hena baku duni lezada maibé la dada no rakut lezada nia fu'uk. Arguidu mós deklara katak arguidu tenta atu dame malu ho lezada maibé lezada nia família sira mak lakohi atu sira dame nune'e to'o agora arguidu ho lezada moris separadu. Liután arguidu deklara katak arrepende ninia hahalok, serbisu hanesan to'os na'in no laiha rendimentu fixu kada fulan, iha oan feto ida ne'ebé hela ho lezada nia inan-aman. Arguidu mós promete sei la repete nia hahalok ne'e iha futuru no foin primeiravés halo krime.

Entretantu, lezada kontinua konfirma faktu sira hotu iha akuzasaun no deklara katak alende moras iha kelen no ulun, lezada mós sofre moras iha isin-lolon parte kotuk. Lezada akresenta tan katak arguidu no lezada la hela hamutuk ona ka separadu ona maski arguidu foin primeiravés halo krime hasoru lezada.

Alegasaun finál

Prokuradór konsidera faktu sira iha akuzasaun provadu mezmú arguidu konfesa parsialmente tanba lezada konfirma faktu sira. Tanba ne'e, prokuradór laiha dúvida no konsidera arguidu nia hahalok ne'e prenze duni elementu krime ofensa integridade física simples ho natureza violénsia doméstika. Bazeia ba konsiderasaun sira ne'e, husu ba tribunál atu aplika pena prizaun tinan ida suspende ba tinan ida fulan neen.

Entretantu defeza fiar liu ba arguidu nia deklarasaun tanba defez a intende katak arguidu nia deklarasaun ne'e onestu. Nune'e mós, arguidu kolabora di'ak ho tribunál, arrepende ninia hahalok, arguidu tenta atu dame malu ho lezada maibé lezada ho nia família mak lakohi dame malu ho arguidu. Arguidu mósnu'udar agrikultór no laiha rendimentu fixu kada fulan, iha oan na'in ida no foin primeiravés mai hatan iha tribunál, tanba ne'e husu ba tribunál atu aplika pena ne'ebé adekuadu.

Desizaun

Depoisde avalia faktu sira hotu, tribunál prova katak arguidu tebe lezada no uza kalsa hena baku lezada. Bazeia ba prova sira hotu no prova dokumental sira inklui tetu mós sirkunstánsia atenuante sira hanesan arguidu arrepende ona ninia hahalok, promete sei la repete iha futuru no arguidu foin primeiravés halo krime, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

14. Krime furtu simples

Nú. Prosesu : 0006/20.PDOEC

Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Filipe Landos (advogadu privadu)
Desizaun : Omologa pedidu dezisténsia keixa

Iha 22 Abril 2021, Tribunál Distritál Oekusi prezide julgamentu tentativa konsiliaun ba krime furtu simples ne'ebé envolve arguidu Camilo Colo hasoru lezadu Abrasco Nesi, iha Aldeia Hautefo, Suku Banafi Sub-distritu Nitibe, Distritu Oekusi.

Akuzasaun Prokuradór

Prokuradór akuza arguidu katak iha lora la apuradu maibé iha Agostu 2020, arguidu na'ok lezadu nia karau vaka aman ida (alin tolu) no arguidu tau ona marka iha karau nia kelen parte karuk. Tanba sente sira nia karau lakon nune'e lezadu ho nia família buka tuir karau aman ne'e. Liu tiha lora rua lezadu ho nia família sira hetan fali karau ne'e iha arguidu nia lutu laran ne'ebé kesi hela, nune'e lezadu ho nia família lori fali karau ne'e ba iha lezadu nia uma.

Prokuradór akuza arguidu kontra artigu 251 KP kona-ba furtu simples ho moldura penál to'o tinan 3 ka multa.

Produsaun ba prova sira

Bazeia ba artigu 262 (1) KPP kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu ho lezadu.

Iha prosesu konsiliaun ne'e, lezadu hakarak dame malu ho arguidu no hakarak deziste tiha keixa hasoru arguidu maibé husu ba arguidu atu labele repete hahalok hanesan iha futuru. Arguidu mós konkorda ho pedidu lezadu nian no deklara katak arrepende ninia hahalok ne'e no promete sei la repete tan iha futuru.

Alegasaun finál

Prokuradór no defeza konkorda no apresia akordu dame ne'ebé parte rua deside ona nune'e husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu, nune'e tuir artigu 262 (2) KPP, tribunál konklui prosesu ne'e no omologa akordu dame ne'e.

15. Krime ofensa ba integridade física simples

Nú. Prosesu : 0020/19.OEOSL
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Calisto Tout
Desizaun : Omologa pedidu dezisténsia keixa

Iha 23 Abril 2021, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguida Maria Colo, Venidora Abi no Ajana Carmelita Abi hasoru lezada Sabina A'u, iha Sub-distritu Oesilo, Distritu Oekusi.

Akuzasaun Prokuradór

Prokuradór akuza arguidu katak iha 24 Setembru 2019, iha oras tuku 10:00 dadeer, sein motivasaun klaru arguida Maria hako'ak metin lezada husi kotuk no arguida Venidora kaer metin lezada nia liman parte karuk, hafoin arguida Ajana tuku dala ida iha lezada nia matan-fukun parte loos rezulta moras. Kazu ne'e aneksa hamutuk ho relatóriu médiku husi sentru saúde no fotografia sira husi polísia kona-ba rezultadu husi violénsia sira ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 (1) KPP kona-ba tentativa ba konsiliaun, juis husu atu halo tentativa konsiliaun ba arguida sira ho lezada.

Iha prosesu konsiliaun ne'e, lezada hakarak deziste tiha nia keixa hasoru arguida sira tanba antes julgamentu arguida sira husu ona deskulpa ba lezada. Mezmu nune'e, iha tribunál nia oin, lezada husu ba arguida sira atu labele repete sira ninia hahalok iha futuru. Arguida sira mós konkorda ho pedidu lezada nian no deklara katak arrepende sira ninia hahalok no promete sei la repete tan hahalok hanesan iha futuru.

Alegasaun finál

Prokuradór no defeza konkorda no apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezada, nune'e tuir artigu 262 (2) KPP, tribunál konklui prosesu ne'e no omologa akordu dame ne'e.

16. Krime ofensa ba integridade fízika simples ho natureza violénsia doméstika

Nú. Prosesu	: 0096/20.OESIC
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Mateus Nesi
Defeza	: Dr. Marcelino Marques Coro
Desizaun	: Pena prizaun fulan 6 maibé suspende ba tinan 1

Iha 27 Abril 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu DAA hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 23 Juñu 2020, iha oras tuku 18:30 kalan, arguidu basa dala tolu iha lezada nia hasan parte loos rezulta moras. Antes ne'e arguidu hemu tua sabu no ho kondisaun lanu arguidu halo agresaun hasoru lezada. Kazu ne'e aneksa hamutuk ho relatóriu médiku husi Ospital Referral Oekusi no fotografia husi polisia kona-ba rezultadu husi aktu violénsia ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu hatene katak halo agresaun hasoru lezada ne'e bele lori konsekuénsia ladi'ak ba lezada no bele hetan moras. Arguidu mós deklarata katak husu ona deskulpa ba lezada no kontinua moris hamutuk to'o agora. Arguidu no lezada forma família desde tinan 2018, iha ona oan na'in rua, serbisu hanesan seguransa iha kompañia STAR ho rendimentu kada fulan US\$115.00 no arguidu foin primeiravés mai hatan iha tribunál.

Alende ne'e, lezada kontinua konfirma faktu sira hotu iha akuzasaun no deklarata katak lezada hakarak atu moris hamutuk nafatin ho arguidu tanba sira hamutuk mak bele sustenta sira nia oan. Alende ne'e, lezada mós konfirma arguidu nia deklarasaun katak arguidu foin primeiravés halo agresaun hasoru lezada no depoizde akontesimentu ne'e to'o agora arguidu la halo ona krime seluk hasoru lezada.

Prokurador husu ba tribunál atu presinde testemuña AT tanba konsidera prova sira sufsiente ona. Ba pedidu refere, defeza laiha opsaun. Tanba ne'e, tribunál presinde audisaun ba testemuña ninia depoimentu.

Alegasaun finál

Prokuradór laiha dúvida ba faktu sira iha akuzasaun tanba arguidu konfesa faktu integralmente. Alende ne'e, número violénsia ne'ebé akontese iha uma laran loron ba loron kontinua sae tanba ne'e importante tebes atu halo prevensaun hodi bele redus violénsia iha uma laran. Bazeia ba konsiderasaun ne'e, husu ba tribunál atu aplika pena ne'ebé adekuadu tuir akuzasaun.

Entretantu defeza husu ba tribunál atu aplika pena ne'ebé kma'an ba arguidu tuir nia sala ho konsiderasaun sira ba iha arguidu nia kolaborasaun di'ak ho tribunál, arrependimentu, primeiravés mai hatan iha tribunál, iha oan na'in rua, diak malu ona ho lezada, serbisu hanesan seguransa iha kompañia STAR no promete ona katak sei la repete ninia hahalok hanesan hasoru lezada ka ema seluk iha futuru.

Desizaun

Tribunál prova katak arguidu basa lezada dala tolu iha hasan parte loos. Bazeia ba prova sira hotu, prova dokumentu sira no tetu mós sirkunstánsia atenuante sira hanesan arguidu konfesa, arrepende ninia hahalok no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun fulan neen suspende ba tinan ida.

17. Krime ofensa ba integridade física simples ho natureza violéncia doméstika

Nú. Prosesu : 0017/20.OEBCN
Kompozisaun Tribunál : Singulár
Juis : Dr. Yudi Pamukas
Prokuradór : Dr. Pedro Baptista Aleixo dos Santos
Defeza : Dr. Calisto Tout
Desizaun : Pena prizaun tinan 1 maibé suspende ba tinan 1

Iha 27 Abril 2021, Tribunál Distritál Oekusi prezide julgamentu leitura sentensa ba krime ofensa ba integridade física simples ho natureza violéncia doméstika ne'ebé envolve arguidu GS hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 06 Maiu 2020, iha oras tuku 20:00 kalan, arguidu basa dala ida iha lezada nia hasan parte karuk rezulta moras. Antes ne'e, arguidu ho kondisaun lanu no hakilar lezada, nune'e lezada hasee arguidu atu labele hakilar tanba kalan ona no sira nia oan toba hotu ona. Ho nune'e arguidu basa lezada. Kazu ne'e aneksa hamutuk ho prova dokumental sira hanesan relatóriu médiku husi sentru saúde no fotografia sira husi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós hatene katak halo agresaun hasoru lezada bele lori konsekuénsia ladi'ak no lezada bele hetan moras. Arguidu deklarata tan katak arguidu husu ona deskulpa ba lezada, dame malu ona no to'o agora laiha tan problema seluk. Alende ne'e, arguidu promete sei la repete ninia hahalok ne'e hasoru lezada ka ema seluk iha futuru, foin primeiravés mai hatan iha tribunál, serbisu hanesan agrikultór nune'e laiha rendimentu fixu kada fulan, forma família desde 2017 no iha ona oan na'in rua.

Nune'e mós lezada kontinua konfirma faktu sira hotu iha akuzasaun no konfirma mós ho arguidu nia deklarasaun katak arguidu foin primeiravés halo krime hasoru lezada no sira dame malu ona.

Alegasaun finál

Prokuradór konsidera arguidu ninia hahalok prenze duni elementu husi krime ofensa ba integridade fízika simples ho natureza violénsia doméstika. Tanba ne'e, husu ba tribunál atu aplika pena prizaun fulan neen suspende ba tinan ida.

Entretantu defeza husu ba tribunál atu aplika pena ne'ebé adekuadu ba arguidu tanba arguidu kolabora di'ak ho tribunál, arrepende ninia hahalok, arguidu husu ona deskulpa no diak malu ona ho lezada, serbisu hanesan agrikultór nune'e laiha rendimentu fixu kada fulan, iha oan na'in rua, arguidu mak responsabiliza ba ninia família no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia hasan parte karuk. Bazeia ba faktu provadu sira ne'e, prova dokumental sira no tetu sirkunstánsia atenuante sira hanesan arguidu arrepende ona ninia hahalok, husu ona deskulpa ba lezada, dame malu ona, promete sei la repete ninia hahalok iha futuro no foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

18. Krime kondusaun sem karta

Nú. Prosesu : 0006/20.OESTR
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena multa US\$50.00

Iha 28 Abril 2021, Tribunál Distritál Oekusi prezide julgamentu leitura sentensa ba krime kondusaun sein karta ne'ebé envolve arguidu Agostinho Sequeira hasoru Estadu RDTL, iha Aldeia Tumin Suku Bobometo, Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 18 Feveireiru 2020, iha oras tuku 12:00 meiodia, arguidu lori motorizada ho marka Honda *Revo Absolut* husi uma atu ba sosa modo iha Merkadu Tumin. Iha momentu ne'e, polísia halo hela pasa revista (*check point*) ba dokumentu sira transporte nian no iha pasa revista ne'e polísia deskobre katak arguidu nia motorizada laiha *chapa* matrikula no arguidu laiha karta kondusaun.

Prokuradór akuza arguidu kontra artigu 207 KP kona-ba kondusaun sein karta ho moldura penál to'o tinan 2 ka multa.

Produsaun ba prova sira

Iha prosesu julgamentu, arguidu konfesa faktu sira hotu iha akuzasaun no deklara katak arrepende ninia hahalok ne'e. Arguidu mós promete sei la repete hahalok hanesan iha futuro no foin primeiravés komete krime. Arguidu hatutan katak nia hatene hahalok hanesan ne'e ladi'ak no kontra lei, arguidu sei klosan, serbisu hanesan agrikultór nune'e laiha rendimentu fixu kada fulan.

Alegasaun finál

Prokuradór konsidera arguidu provadu komete krime kondusaun sein karta bazeia ba konfisaun arguidu nian. Prokuradór haktuir tan katak krime kondusaun sein karta kada fulan sempre akontese, tanba ne'e husu ba tribunál atu kondena arguidu ho pena ne'ebé hakerek ona iha artigu 207 KP nune'e bele eduka arguidu la repete hikas nia hahalok ne'e iha futuru no prevene ema seluk labele halo tuir.

Enkuantu defeza haktuir katak arguidu konfesa, arrepende ninia hahalok, foin primeiravés mai hatan iha tribunál no laiha rendimentu fixu kada fulan tanba arguidu serbisu hanesan to'os na'in. Alende ne'e, arguidu promete ona ba tribunál katak sei la repete hikas ninia hahalok ne'e iha futuru no arguidu mós foin sae (sei kolsan) no iha possibilidade atu hadia nia aan iha futuru. Tanba ne'e, husu ba tribunál atu aplika pena ne'ebé kma'an ba arguidu tuir nia sala.

Desizaun

Tribunál prova arguidu kondús motorizada iha estrada públiku sein karta kondusaun no laiha *xapa* matrikula. Bazeia ba faktu provadu hirak ne'e hotu no tetu mós sirkunstánsia atenuante sira hanesan arrepende ninia hahalok no foin primeiravés komete krime, nune'e tribunál konklui prosesu ne'e no kondena arguidu ho pena multa US\$50.00 ne'ebé kada lora arguidu sei selu US\$1.00 durante lora 50. Kuandu liutiha lora sanulu 15 mak arguidu la kumpri pena multa refere, tribunál sei aplika pena alternativa durante lora 32 iha prizaun.

19. Krime ofensa ba integridade fízika simples ho natureza violénsia doméstika

Nú. Prosesu : 0044/19.OEBCN
Kompozisaun Tribunál : Singulár
Juis : Dr. Yudi Pamukas
Prokuradór : Dr. Mateus Nesi
Defeza : Dr. Marcelino Marques Coro
Desizaun : Pena prizaun tinan 1 maibé suspende ba tinan 1

Iha 29 Abril 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve husi arguidu JL hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 15 Outubru 2019, iha oras tuku 18:00 kalan, arguidu ho kondisaun lanu tuku dala ida iha lezada nia kanuruk rezulta moras. Kazu ne'e aneksa hamutuk ho relatóriu médiku husi sentru saúde no fotografia sira husi polisia kona-ba rezultadu violénsia ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha prosesu julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós hatene katak hahalok ne'e lori konsekuénsia ladi'ak ba lezada no bele hetan moras. Arguidu hatutan katak dame malu ona ho lezada no kontinua moris hanesan feen-la'en ate agora. Arguidu promete sei la repete ninia hahalok ne'e hasoru lezada ka ema seluk iha futuru, foin primeiravés mai hatan iha tribunál, serbisu hanesan agrikultór nune'e laiha rendimentu fixu kada fulan no iha oan na'in ualu.

Alende ne'e, lezada mós kontinua konfirma faktu sira hotu iha akuzasaun no konfirma mós ho arguidu nia deklarasaun katak sira dame malu ona no arguidu foin primeiravés halo krime hasoru lezada.

Alegasaun finál

Prokuradór konsidera arguidu nia hahalok ne'e prenze duni elementu husi krime ofensa ba integridade fízika simples ho natureza violénsia doméstika, nune'e husu ba tribunál atu aplika pena ne'ebé adekuadu tuir artigu 145 KP.

Entretantu defeza husu ba tribunál atu fó kastigu ne'ebé kma'an ba arguidu tanba arguidu kolabora di'ak ho tribunál, arrepende ninia hahalok, serbisu hanesan agrikultór nune'e laiha rendimentu fixu kada fulan, iha oan na'in ualu, sira di'ak malu ona, arguidu mak responsabiliza ba iha nia família no foin primeiravés mai hatan iha tribunál.

Desizaun

Depoisde avalia faktu sira hotu, tribunál prova katak arguidu ho kondisaun lanu tebe dala ida iha lezada nia kanuruk. Bazeia ba faktu provadu sira, prova dokumental no tetu mós sirkunstánsia sira ne'ebé haleu iha krime ne'e, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

20. Krime ofensa ba integridade fízika simples ho natureza violénsia doméstika

Nú. Prosesu	: 0015/19.OEBCN
Kompozisaun Tribunál	: Singulár
Juis	: Dr. Yudi Pamukas
Prokuradór	: Dr. Pedro Aleixo Baptista dos Santos
Defeza	: Dr. Marcelino Marques Coro
Desizaun	: Pena prizaun tinan 1 maibé suspende ba tinan 1

Iha 29 Abril 2021, Tribunál Distritál Oekusi prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu ETF hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 15 Maiu 2019, iha oras tuku 11:00 dadeer, arguidu basa dala ida iha lezada nia hasan parte loos rezulta moras. Antes ne'e, arguidu haruka lezada tein sasoro ba sira nia oan maibé lezada la tein. Ho nune'e arguidu halo agresaun refere hasoru lezada.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'ó tinan 3 ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha prosesu julgamentu, arguidu konfesa faktu hotu iha akuzasaun no deklara katak hatene aktu ne'e bele lori konsekuénsia ladi'ak no moras ba lezada. Arguidu deklara tan katak arrepende ninia hahalok, husu ona deskulpa ba lezada no kontinua moris hamutuk ho lezada. Arguidu mós promete sei la repete ninia hahalok ne'e hasoru lezada ka ema seluk iha futuru, foin primeiravés mai hatan iha tribunál, serbisu hanesan agrikultór nune'e laiha rendimentu fixu kada fulan no iha ona oan na'in rua.

Nune'e mós lezada kontinua konfirma faktu sira iha akuzasaun inklui konfirma mós ho arguidu nia deklarasaun.

Alegasaun finál

Prokuradór konsidera arguidu ninia hahalok ne'e preense duni elementu krime ofensa integridade fízika simples. Tanba ne'e, husu ba tribunál atu aplika pena prizaun fulan neen suspende ba fulan neen.

Entretantu defeza husu ba tribunál atu fó kastigu ne'ebé kmaan ba arguidu tanba arguidu kolabora di'ak ho tribunál, arrepende ninia hahalok, serbisu hanesan agrikultór nune'e laiha rendimentu fixu kada fulan, iha oan na'in rua, di'ak malu ona ho lezada, arguidu mak responsabiliza ba nia família no foin primeiravés halo krime hasoru lezada.

Desizaun

Depoisde avalia faktu sira hotu, tribunál prova katak arguidu basa dala ida iha lezada nia hasan parte loos. Bazeia ba faktu provadu sira no prova dokumental sira inklui tetu mós sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no promete sei la repete ninia hahalok hanesan iha futuru, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl